

Bosna i Hercegovina
Federacija Bosne i Hercegovine
Unsko-sanski kanton
OPĆINA VELIKA KLADUŠA



Bosnia and Herzegovina
Federation of Bosnia and Herzegovina
Una-Sana canton
Municipality of Velika Kladusa

OPĆINSKI NAČELNIK

MAYOR OF MUNICIPALITY

Broj: 02-04-1313 /21
Velika Kladuša, 04.06. godine

Zahtjev za preispitivanje Zaključka Općinskog vijeća Općine Velika Kladuša broj: 01-04-223/21 od 27.5.2021. godine

Općinski načelnik Općine Velika Kladuša u skladu sa članom 20. Zakona o principima lokalne samouprave u FBiH („Službene novine FBiH“, broj 49/06) i članom 43. stav 1, tačka 16. Statuta Općine Velika Kladuša („Službeni glasnik Općine Velika Kladuša“, broj: 12/11) upućuje Zahtjev za preispitivanje Zaključka Općinskog vijeća Općine Velika Kladuša broj: 01-04-223/21 od 27.5.2021. godine, kojim se ne usvaja prijedlog Odluke o finansijskim izvještajima i periodični Izvještaj o izvršenju budžeta za period 1.1-31.3.2021. godine.

O b r a z l o Ź e n j e

Članom 20. Zakona o principima lokalne samouprave u FBiH („Službene novine FBiH“, broj: 49/06) propisano je: “Vijeće, odnosno, načelnik/ca može u roku od tri dana nakon donošenja odluke zatražiti da vijeće, odnosno načelnik/ca preispita odluku ili akt koji smatra neustavnim ili nezakonitim“.

Zaključkom Općinskog vijeća Općine Velika Kladuša broj: 01-04-223/21 od 27.5.2021. godine, ne usvaja prijedlog Odluke o finansijskim izvještajima i periodični Izvještaj o izvršenju budžeta za period 1.1-31.3.2021. godine.

Shodno Zakonu o budžetima u Federaciji Bosne i Hercegovine („Službene novine FBiH“, broj: 9/14, 13/14, 8/15, 91/15, 102/15, 104/16, 5/18, 4/19 i 99/19) općinska Služba za finansije dužna je dostaviti kvartalne izvještaje Općinskom vijeću i Kantonalnom ministarstvu finansija. Postupajući po navedenoj zakonskoj odredbi Općinski načelnik je Općinskom vijeću dostavio predmetni materijal, čime je u potpunosti ispoštovana zakonska obaveza koja proizilazi iz tog Zakona.

Općinski načelnik smatra da je neusvajanje predmetne Odluke, odnosno finansijskog izvještaja nezakonito i bez ikakvog uporišta. Cijeneći da je izvršavanje Budžeta u datom periodu, u cijelosti zasnovano na propisima, polazeći od Odluke o izvršavanju budžeta Općine Velika Kladuša za 2021. godinu („Službeni glasnik Općine Velika Kladuša“, broj: 4/21) i da ne postoji osnov za neusvajanje, niti je neusvajanje ičim obrazloženo, Općinski načelnik je osnov za podnošenje ovog zahtjeva našao uprava u citiranoj odredbi člana 20. Zakona o principima lokalne samouprave u FBiH („Službene novine FBiH“, broj: 49/06).

Bez obzira na činjenicu da pravni poredak ne propisuje obavezu usvajanja ovakvih materijala od strane općinskog vijeća, niti je eventualno usvajanje preduslov za bilo kakve dalje radnje i aktivnosti, polazeći od civilizacijskih tekovina koje propisuju odgovornost izabраниh zvaničnika, u konkretnom slučaju općinskih

vijećnika, a u vezi sa obavezom obrazlaganja svojih odluka i stavova, Općinski načelnik traži da Općinsko vijeće predmetni zaključak preispita i da u slučaju potvrđivanja, svoju odluku obrazloži. Ovdje se podsjeća na član 13. stav 3. Zakona o principima lokalne samouprave u FBiH („Službene novine FBiH“, broj: 49/06), koji glasi: „Članovi vijeća odgovaraju za ustavnost i zakonitost akata koje vijeće donosi u okviru svojih nadležnosti“.

Shodno Evropskom kodeksu ponašanja lokalnih i regionalnih izabranih zvaničnika, izabrani zvaničnici će za svaku svoju odluku davati iscrpno obrazloženje, uz navođenje svih činjenica na kojima je ta odluka zasnovana, a posebno koja pravila i propisi su primijenjeni, uz ukazivanje na to da odluka udovoljava tim pravilima i propisima. U nedostatku pravila i propisa, obrazloženje odluke će obuhvatiti elemente kao što su ukazivanje na njenu uravnoteženost, pravičnost i suglasnost sa općim interesom. Kako se radi o Kodeksu Vijeća Evrope, čija je Bosna i Hercegovina članica, navedeni principi predstavljaju standard preuzet i u našem pravnom poretku. Budući da je u toku procedura izmjena i dopuna Zakona o principima lokalne samouprave, a kako je praksa, uključujući i onu u našoj lokalnoj zajednici, pokazala potrebu doslovnog inkorporiranja navedenih odredbi u ovaj propis, bez obzira na spomenuti status Bosne i Hercegovine u vijeću Evrope, očekuje se detaljnije zakonsko normiranje ovog pitanja.

Zbog prednje navedenog, Općinski načelnik Općine Velika Kladuša upućuje Zahtjev za preispitivanje Zaključka Općinskog vijeća Općine Velika Kladuša broj: 01-04-223/21 od 27.5.2021. godine.

OPĆINSKI NAČELNIK

Fikret Abdić, dipl. ing.



Dostavljeno:

1. Općinsko vijeće Općine Velika Kladuša,
2. Kabinet načelnika,
3. evidencija,
4. a/a.